

22 JUIN 2017

3095

Här Mars di Bartolomeo
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 22. Juni 2017

Här President,

Sou wéi d'Chambersreglement et virgesäit, bieden echlech, dës parlamentaresch Fro un d'Regierung weiderzeleeden.

Et ass kee Geheimnis, datt leider nach ëmmer eng negativ an heiansdo souguer feindlech Haltung géigeniwwer dem jiddesche Vollek, respektiv géigeniwwer Leit mat jiddeschem Glawen, bei ville Leit verbreet ass. An Israel, mee och op villen anere Plazen, kënn et ëmmer nees zu geziilten Attentater géint Judden.

An deem Zesammenhang géing ech gär folgend Froen un d'Regierung stellen.

1. Ginn et aktuell Kenntneser iwver den Antisemitismus zu Lëtzebuerg a speziell an de Schoulen? Wa jo, op wat fir enger Grondlag baséieren déi Kenntneser?
2. Sollt d'Regierung kee speziell an aktuellt Wëssen zu deem Thema hunn, denkt si datt et sënnvoll wär, Etudë maachen ze loossen?
3. Huet d'Regierung e präventiivt Konzept virgesinn? Wa jo, wéi gesäit dat Konzept aus?

Mat déiwem Respekt,



Fernand Kartheiser
Deputéierten



Luxembourg, le 27 juillet 2017

Monsieur le Président de la Chambre des
Députés
19, rue du Marché-aux-Herbes
L-1728 Luxembourg

Réponse du Ministre de l'Éducation nationale, de l'Enfance et de la Jeunesse à la question parlementaire N° 3095 du Député Fernand Kartheiser

D'Regierung ass sech bewusst, datt den Antisemitismus an dem globale politesche Klima vun de leschte Joren an duerch d'rasant Ausbreedung vun de soziale Medien en Opschwung an der Welt erlieft huet. Datt deem muss entgéintgewierkt gi steet ausser Fro, a Lëtzebuerg ass bereet, sech do ze engagieren: esou wäert eist Land zum Beispill 2019 d'Présidence vun der *International Holocaust Remembrance Alliance (IHRA)* iwwerhuelen, enger intergouvernementaler Organisatioun, bei där mir zënter 2003 Member sinn, an déi et sech zum Zil gesat huet, fir der Shoah ze gedenken, an d'Ursaache fir esou Katastrophen ze ënnerbannen.

Ad 1)

Dem Educationsministère si keng antisemitesch Virfäll an eise Schoule bekannt. Just ee Fall aus enger Privatschoul ass bekannt. An deem Fall ass de Ministère am Gaang, aktiv no Léisungen ze sichen, obschonns mer bei dëse Schoule manner Emprise hunn. D'Schoul selwer huet de Virfall natierlech direkt sanktionéiert.

De Ministère schafft enk mat den Direktiounen zesummen, déi selwer duerch de Kontakt mat hiren Enseignanten an dem SPOS op esou Fäll géingen opmierksam ginn. D'Leit an de Schoule sinn sech natierlech bewusst, datt Fäll vun Antisemitismus extrem seriö sinn, ma et schéngt glécklecherweis esou ze sinn, datt mir hei am Land déi Problemer, déi et bei verschiddene vun eisen Noperen gëtt, an deem Mooss net hunn.

D'Regierung ass sech awer duerchaus bewusst, datt muss dru geschafft ginn, fir ze verhënneren, datt esou Entwécklungen och bei eis Fouss faassen.

Ad 2)

De Ministère ass duerchaus interesséiert, fir Etuden zu deem Thema maachen ze loossen, an huet sech eng Rei vun esou Studien aus dem Ausland zur Inspiratioun ugekuckt.

Ad 3)


Wuel eng vun de wichtigste Methoden, fir dem Antisemitismus entgéintzewierken, ass fir d'Leit opzeklären an zum kriteschen Denken ze beweegen, fir Viruerteeler als solch ze erkennen, a fir de Verschwörungstheorien, déi an der haiteger Zäit virun allem an de sozialen Netzwierker zirkuléieren, als geféierlech Fantasien ze entlarven. Dofir ass et och wichtig, datt d'Schüler d'Realitéit kenneléieren, an net einfach op d'Vedréiunge vu Populisten erafalen.

Dofir gëtt d'jiddesch Geschicht an den Antisemitismus och an de Coursë behandelt. Dëst geschitt souwuel an dem geschichtleche Kontext iwwert verschidden Eochen (vum Mëttelalter iwwert d'19. Joerhonnert an den Holocaust, bis zum No-Ost-Konflikt), wéi och an dem haitege sozialen Ëmfeld. D'Thema gëtt och an anere Fächer, wéi de Sproochen, behandelt, sief et duerch 'lecture cursive', oder d'Behandele vun aktuellen Themen.

Dat neit Fach "Vie et Société" ass speziell konzipiéiert, fir de schiedlechen Entwécklungen, déi mer an dësen Zäite leider allzevill gesinn, entgéint ze wierken. Den Zentrum fir Politesch Bildung huet dëst als eent vu sengen Haaptziler. Dozou kënnt, datt besonnesch unhand vun der Shoah d'Schüler duerch Visiten a Commémoratioune mat de Geforen an de Konsequenze vum Antisemitismus konfrontéiert an zum Iwwerleeë bruecht ginn. Esou huet zum Beispill d'Austellung 'Between Shades and Darkness' iwwer d'Judden zu Lëtzebuerg an den 30er a 40er Joren den Tour vu ville Schoule gemaach.

De Ministère leet grouse Wäert op d'Weiderbildung vun den Enseignanten, fir an de Schoulen op déi richteg Manéier op Fäll vun Intoleranz ze reagieren an se ze ënnerbannen. Sou bitt den IFEN zum Beispill Formatioune iwwert "*Radikalisierung von Kindern/Jugendlichen – Präventionskonzepte*" oder "*Politischer & Religiöser Radikalismus / Radikalisierungsprozesse bei Jungen Menschen*" un, fir richteg mat esou Problemer eens ze ginn, oder awer "*Geschichte der jüdischen Minderheit in Luxemburg*", fir ze sensibiliséieren, an et den Enseignanten ze erlaben, dëst och un hir Schüler weiderzeginn.

Am Ament gëtt un engem Accord mat Yad Vashem geschafft, deem säin Zil et ass, weider Formatioune vun deem Genre unzebidden. Lëtzebuerg huet natierlech och Kontakt mat aneren Organisatioune am Ausland, déi sech mat deem Thema befaassen, an huet fest vir, esou Kontakter och weider auszebauen.



Claude Meisch
Ministre de l'Éducation nationale, de l'Enfance et de la Jeunesse